


Presidente di Dare to Dream Foundation:

“Caracter y disciplina ta mes importante cu talento”



ORANJESTAD(AAN): Di ahuebs durante un conferencia di prensa pa firmamento di un acuerdo entre Dare to Dream Foundation y ATA, presidente di e fundacion Sandra Brown, mama di Xander Bogaerts a duna un splicacion riba e fundacion di su yiu homber.

“Dare to Dream Foundation ta un fundacion cu a wordo lanta na 2013, ora cu Boston Red Sox a gana e World Series y nos a trece nos heroe Xander Bogaerts cas”.

“Nos a pensa con Xander por aporta mas ainda na su comunidad, banda di e hecho cu e ta aporta caba como un deportista cu cada

rato ta purba halza Aruba su number”.

Esaki segun señora Brown, kende a indica cu a lanta e fundacion cu e intencion pa yuda hobennan cu mester ayudo pa haya cierto material pa por practica nan deporte y no por haya esaki di nan mayornan of famia.

“Ami tabata un mama soltero y tempo cu mi dos yiunan tabata hunga bala, tin biaha tabata e omonan cu tabata mester aporta pa nan por haya nan cosnan pa nan por bay veld”.

“Pues nos sa kico kiemen ora cu bo no tin bo cosnan y bo tin mester di otro hende pa yudabo”.

Esaki segun Brown, kende a sigui bisa cu durante e 5 añanan cu a pasa, cu amor e fundacion ta purba yuda hoben.

El a indica cu banda di esaki e fundacion ta yuda equiponan di baseball cu tin mester di equipo, uniforma por ehempel.

Presidente di Dare to Dream Foundation a sigui bisa cu nan ta yuda hoben tambe pa bay afo, unda cu scoutnan por wak nan.

E fundacion a yuda 12 hoben talentoso bay Corsow algun tempo atras, door cu e tempo ey tabata tin hopi mas scout cu ta bay Corsow, compara cu Aruba.



Un di e 12 hobennan ey a wordo firma caba y a cuminza su trayecto pa por purba yega Major League.

E fundacion a yuda hobennan tambe den pasado pa bay purba haya un scholarship na Merca.

Señora Brown a indica tambe cu un di e partinan mas importante pa un hoben yega leu, cu chens pa yega Major League, ta su caracter y su disciplina.

“Tin biaha ora bo tende cierto sumanan bo cabez por susha y bo ta manera cana banda di bo zapatonan”.

“Ta den e cosnan aki Dare to Dream ta mira cu bo tin cu pone mas enfoke”, segun Brown, kende a splica cu for di un principio esaki a wordo muestra na dje y su yiunan door di e scout cu a firma Xander y Jair.

E scout a muestra riba e importancia pa nan ta respetu-

oso cu tur e hendenan cu nan topa.

Pesey Dare to Dream ta enfoca tambe hopi riba esaki. E scout a duna ehempel di peloteronan cu tin hopi talento, pero mayoria equipo no kier nan door di nan mal caracter por ehempel.

“Hopi biaha mayornan na Aruba no sa esey y pesey nos kier comparti esaki cu nan”.

“Formacion di bo yiu ta cuminza na cas y e manera con bo ta papia cu bo yiu, ta e manera con e ta bay papia cu otro hende”, segun Brown kende a indica cu dare to Dream ta purbando di haya un edificio propio, mirando cu tur cos ta bay via e cas di Brown.

E fundacion tin varios plan, incluyendo un opvang pa despues di school y ayudo cu huiswerk